

■ CONVIVENZA

La reincarnaziun academica

DA VIOLA CADRUVI*

Cura ch'jau er anc al gimnasi era jau persuadida ch'jau vegnia a chapir la vita, l'univers e tut il rest il mument ch'jau haja la finala en satg la matura. Tut quai che ma pareva da lez temp anc diffus ed intschert, vegnia ad esser cler suenter quests examens. Jau pensava ch'jau vegnia a cumenzar il studi ed a leger tut quests cudeschs che ma parevan da lez temp sco gronds misteris, e ch'jau vegnia cun ina giada a chapir tut las allusiuns, tut las allegorias, tut ils misteris e tut quai che quels gronds auturs vulan atgnamain dir.

Durant mes studi da bachelor hai jau lura cumenzà a far referats, scriver lavurs ed jau hai propi era legì ina massa cudeschs. Ma tuttina: Tut quai ch'jau fascheva ma pareva sco in murcs, mias lavurs ma parevan sco in zambregim d'ina poppa da scoletta. El las consistivan da citats tagads ensemen arbitramain ed ornads cun ponderaziuns artificialas e cumplettamain irrelevantas. Ma en il master, uschia pensav'jau, saja quai lura tut auter. Lura vegnian mias lavurs ad esser eloquentas, mes citats relevants e mes patratgs intelligents ed impurtants.

Cura ch'jau seseva la finala cun l'attestat da bachelor en satg en las pre-



lecziuns da master n'era dentant sa midà nagut. Anc adina enconuschev'jau mo la mesadad da las teorias che vegnivan menziunadas e chapir chapiv'jau anc da main. Cun mintga lavur ch'jau consegnava ma sentiv'jau pli fitg sco ina engianadra. Mias lavurs ma parevan anc adina nunsignificantas, artificialas, jau veseva las cusadiras tranter las alineas, las inclerezzas dals arguments. Insacura stueva bain ina giada insatgi – ina professuressa, in docent, Son Niclà – vesair ch'jau fabricitava qua mo in murcs starmentus. Insatgi stueva gea insacura percorscher ch'jau n'aveva atgnamain nagina idea da nagut e ch'jau fascheva simplamain uschia sco sche...

Ma jau hai survegnì mes attestat da master. E curt suenter er anc mes diplom da scolasta. E cura ch'jau sun m'annunziata per in program da doctorat a l'Universitad da Turitg hai jau puspè pensà: Bun, quai èsi ussa stà, ussa

vegn tut a la glisch. Quels na vegnan mai ad acceptar in' inoltraziun talmain zambregiada, in project scientific ch'jau hai inventà. Ma jau sun vegnida acceptada ed hai cumenzà cun la lavur vi da mia dissertaziun. Jau sun m'inscuntrada cun autras doctorandas e tuttina hai jau già in'illuminaziun: Ins ha adina il sentiment che tut vegnia pli cler sin il proxim stgalim. E cura ch'ins cuntanscha quest stgalim emblid'ins ch'ins ha gea emprendì ina massa e sa stenta puspè per la proxima prestaziun.

Cun la carriera academica èsi pia in pau sco cun la reincarnaziun, ins spera adina ch'il proxim stgalim portia l'illuminaziun. E sco tuttas empermisschuns religiosas è era questa probablamain plitost illusiun che realitad. Uschia ch'ins sa sprova cartaiवलamain l'entira vita senza cuntanscher adempliment. Ma era cun questa savida hai jau gia uss ina temuna da la defensiun da mia dissertaziun. Durant mes studi hai jau dentant almain chattà la resposta a la vita, l'univers e tut il rest – numnadamain en il cudesch «Per Anhalter durch die Galaxis». La resposta è «42».

*** Viola Cadruvi ha studegià germanistica, istorgia e rumantsch a l'Universitad da Turitg. Mintgant lavura ella vi da sia dissertaziun e mintgant sco scolasta, ma bunamain adina scriva ella.**